

Broj: 03-02-620/2026  
Sarajevo, 26.03.2026. godine

**PARLAMENT FEDERACIJE  
BOSNE I HERCEGOVINE**

- Predstavnički dom -

- Dom naroda - ✓  
gosp. Tomislav Martinović, predsjedavajući

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO

Primljeno:		26-03-2026	
Org. jed.	Broj	Priloga	Vrijednost
0102	-02-	915	/26

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 191. i 192. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i čl. 186. i 187. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09, 24/20 i 60/24), **radi razmatranja i usvajanja po hitnom postupku, dostavljam Vam PRIJEDLOG ZAKONA O IZMJENAMA I DOPUNAMA ZAKONA O GASOVODU „JUŽNA INTERKONEKCIJA BOSNA I HERCEGOVINA I REPUBLIKA HRVATSKA“**, koji je utvrdila Vlada Federacije Bosne i Hercegovine na 298. hitnoj sjednici, održanoj 25.03.2026. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



PREMIJER  
Nermin Nikšić

Prilog:

- Prijedlog zakona na bosanskom jeziku (CD)
- Tekst odredbi Zakona koje se mijenjaju i dopunjuju
- Obrazac IFP NE
- Zakon o gasovodu „Južna interkonekcija Bosna i Hercegovina i Republika Hrvatska“ („Službene novine Federacije BiH“, broj: 10/25)

**Co: Federalno ministarstvo energije, rudarstva i industrije**  
gosp. Vedran Lakić, ministar

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON O IZMJENAMA I DOPUNAMA  
ZAKONA O GASOVODU "JUŽNA INTERKONEKCIJA BOSNA I HERCEGOVINA I  
REPUBLIKA HRVATSKA"**

**Sarajevo, mart 2026. godine**

## **PRIJEDLOG ZA DONOŠENJE ZAKONA PO HITNOM POSTUPKU**

Vlada Federacije Bosne i Hercegovine predlaže Parlamentu Federacije Bosne i Hercegovine da Prijedlog zakona o izmjenama i dopunama Zakona o gasovodu „Južna interkonekcija Bosna i Hercegovina i Republika Hrvatska“ razmatra i usvoji po hitnom postupku.

### **O b r a z l o ž e n j e prijedloga za donošenje zakona po hitnom postupku**

Razlog za podnošenje ovog prijedloga ogleda se u potrebi hitnog usklađivanja postojećeg zakonskog okvira sa aktuelnim energetske, ekonomskim i strateškim interesima Federacije Bosne i Hercegovine i Bosne i Hercegovine. Predložene izmjene i dopune imaju za cilj unapređenje pravnog i institucionalnog okvira za realizaciju projekta Južne interkonekcije, koji predstavlja jedan od ključnih infrastrukturnih i strateških projekata u oblasti energetike.

Realizacija projekta Južne interkonekcije ima poseban značaj za jačanje energetske sigurnosti Bosne i Hercegovine, diverzifikaciju izvora i pravaca snabdijevanja prirodnim gasom, unapređenje regionalne energetske saradnje, kao i usklađivanje sa energetske politikama i standardima Evropske unije.

S obzirom na strateški značaj projekta i potrebu ubrzanja procedura koje će omogućiti njegovu realizaciju, smatramo opravdanim da se Prijedlog zakona razmatra po hitnom postupku, u skladu sa odredbama poslovnika.

Hitni postupak je opravdan jer predložene izmjene i dopune ne mijenjaju osnovna načela postojećeg zakona, već imaju za cilj preciziranje pojedinih odredbi, otklanjanje uočenih nedostataka u primjeni zakona, te stvaranje efikasnijeg pravnog okvira za implementaciju projekta.

Uzimajući u obzir sve navedeno, predlaže se da Parlament Federacije Bosne i Hercegovine prihvati ovaj zahtjev i omogući razmatranje Prijedloga Zakona o izmjenama i dopunama Zakona o gasovodu „Južna interkonekcija Bosna i Hercegovina i Republika Hrvatska“ po hitnom postupku, bez nacrtu zakona.

**Zakon o izmjenama i dopunama  
Zakona o gasovodu "Južna interkonekcija Bosna i Hercegovina i Republika  
Hrvatska"**

**Član 1.**

U Zakonu o gasovodu "Južna interkonekcija Bosna i Hercegovina i Republika Hrvatska" („Službene novine Federacije BiH“, broj: 10/25) u članu 1. iza riječi: „i pravcu Posušje“ dodaje se interpunkcijski znak crtica i riječ „Grude“, iza riječi: „Gornjem Vakufu – Uskoplju“ dodaje se interpunkcijski znak zarez i riječi: „Donjem Vakufu“, iza riječi „Jajcu“ dodaje se interpunkcijski znak zarez i riječi: „te odvojkju za Čapljinu i dodatnim pravcem Kladanj - Tuzla“, a riječi: „tačku interkonekcije“, brišu se.

**Član 2.**

Član 4. briše se.

**Član 3.**

Član 5. mijenja se i glasi:

**„Član 5.  
(Investitor)“**

- (1) Za nositelja investicije projekta izgradnje gasovoda „Južna interkonekcija BiH i Republika Hrvatska“ određuje se kompanija AAFS Infrastructure and Energy d.o.o. sa sjedištem u Sarajevu (u daljnjem tekstu: Investitor).
- (2) Prava i obaveze ugovornih strana u vezi sa realizacijom projekta iz stava (1) ovog člana urediti će se Ugovorom koji će Investitor i Vlada Federacije Bosne i Hercegovine sklopiti u roku od 30 dana od dana stupanja na snagu ovog zakona. Prilikom zaključenja Ugovora, ugovorne strane mogu primijenjivati odredbe Zakona o koncesijama Federacije Bosne i Hercegovine („Službene novine Federacije BiH“, br. 40/02 i 61/03) koje se odnose na zaključenje ugovora o koncesiji.  
Okvirni sadržaj Ugovora iz ovog stava će utvrditi Vlada Federacije Bosne i Hercegovine posebnim zaključkom.
- (3) Operator postojećeg transportnog sistema u Federaciji Bosne i Hercegovine kao dotadašnji nosilac investiciono – tehničke dokumentacije i važećih akata dužan je na zahtjev Investitora predati dokumentaciju u roku od 15 dana od dana podnošenja zahtjeva uz obavezu Investitora na snošenje stvarnih troškova koje je Operator postojećeg transportnog sistema u Federaciji Bosne i Hercegovine izdvojio za izradu te dokumentacije.
- (4) Nakon preuzimanja dokumentacije iz stava (3) ovog člana Investitor podnosi zahtjeve nadležnim tijelima za izmjenu svih važećih akata.
- (5) Nadležna tijela iz stava (4) ovog člana dužna su izvršiti izmjenu važećih akata u roku od 15 dana od dana prijema pisanog zahtjeva Investitora.

- (6) Investitor će projekat izgradnje gasovoda „Južna interkonekcija BiH i Republika Hrvatska“ realizirati kroz:
- a) izgradnju interkonekcijskog transportnog gasovoda u Bosni i Hercegovini na pravcu Posušje - Tomislavgrad - Šuica - Kupres - Bugojno - Novi Travnik/Travnik i pravcu Posušje – Grude - Široki Brijeg – Mostar;
  - b) izgradnju odvojka za Livno, Gornji Vakuf – Uskoplje, Donji Vakuf, Jajce, te odvojak Čaplinju;
  - c) izgradnja dodatnog pravca Kladanj – Tuzla.
- (7) Investitor iz stava (1) ovog člana dužan je da, nakon puštanja u pogon gasovoda „Južna interkonekcija BiH i Republika Hrvatska“ iz stava (6) ovog člana, obezbijedi njegov siguran rad i sve tehničke uslove za prihvatanje u transportni sistema gasa i njegovu isporuku korisnicima,
- (8) Operator postojećeg transportnog sistema u Federaciji Bosne i Hercegovine se zadužuje da osposobi postojeći vlastiti transportni sistem (etapno) za reverzibilan rad i prilagodi ga tehničkim zahtjevima, i na taj način omogući stabilno snabdijevanje postojećih potrošača u Federaciji Bosne i Hercegovine.
- (9) Izuzetno od odredbi Zakona o privrednim društvima („Službene novine Federacije BiH“, br. 81/15 i 75/21), za bilo kakvu, direktnu ili indirektnu promjenu vlasničke ili upravljačke kontrole nad Investitorom, uključujući sticanje ili raspolaganje sa više od 15% udjela, otuđenje ekonomskih interesa, davanje opcija ili na bilo koji drugi način opterećivanja udjela u Investitoru nije dozvoljeno bez prethodnog odobrenja Parlamenta Federacije Bosne i Hercegovine. Ovo se ne odnosi na finansiranje ili refinansiranje, davanje ili izvršenje osiguranja, opcije, konvertibilne instrumente, prijenose ekonomskih interesa, interne reorganizacije ili promjene na nivou vlasnika koje ne dovode do promjene kontrole.
- (10) Investitor je dužan prijaviti svaku namjeravanu promjenu iz stava (9) ovog člana Vladi Federacije Bosne i Hercegovine. Nepostupanje po ovoj obavezi predstavlja osnov za pokretanje postupka oduzimanja prava dodijeljenih ovim zakonom.“

#### **Član 4.**

Član 6. briše se.

#### **Član 5.**

Član 7. mijenja se i glasi:

#### **„Član 7.**

#### **(Javni interes i provedba eksproprijacije)**

- (1) Utvrđuje se da je izgradnja gasovoda „Južna interkonekcija BiH i Republika Hrvatska“ javni i strateški interes Federacije Bosne i Hercegovine.
- (2) Izuzetno od odredbi Zakona o eksproprijaciji („Službene novine Federacije BiH“, br. 70/07, 36/10, 25/12, 8/15 - Presuda Ustavnog suda Federacije Bosne i Hercegovine broj U-64/14 i 34/16), Investitor je korisnik eksproprijacije i radi potrebe za izgradnju, rad i održavanje projekta „Južna interkonekcija BiH i Republika Hrvatska“ ne plaća naknadu za ekspropriisanu nekretninu Federaciji

Bosne i Hercegovine, kantonima, gradovima, općinama, javnim preduzećima ili javnim ustanovama.

- (3) Investitor je dužan da obešteti vlasnike nekretnina, fizička lica, za eksproprisane nekretnine.
- (4) Obavezuju se općinske službe za upravu koje provode postupke eksproprijacije, kroz namjenski formirane komisije, da obezbijede prioritetan rad komisija na predmetima eksproprijacije vezanim za realizaciju projekta „Južna interkonekcija BiH i Republika Hrvatska“.
- (5) Sve eksproprisane nekretnine dobijaju status dobra od općeg interesa.“

#### **Član 6.**

U članu 9. stav (3) iza riječi: „iz stava (2) ovog člana“ dodaju se riječi: „kao i svi uslovi zaštite okoliša propisanih naknadno u skladu sa stavom (5) ovog člana.“

#### **Član 7.**

Ovaj zakon stupa na snagu osmoga dana od dana objavljivanja u "Službenim novinama Federacije BiH".

**OBRAZLOŽENJE**  
**PRIJEDLOGA ZAKONA O IZMJENAMA I DOPUNAMA**  
**ZAKONA O GASOVODU "JUŽNA INTERKONEKCIJA BOSNA I HERCEGOVINA I**  
**REPUBLIKA HRVATSKA"**

**I – USTAVNI OSNOV**

Ustavni osnov za donošenje Zakona o izmjenama i dopunama Zakona o gasovodu „Južna interkonekcija Bosna i Hercegovina i Republika Hrvatska“ sadržan je u članu III.1. tačka f), koji je izmijenjen amandmanima VIII., LXXXIX. i CVI. na Ustav Federacije Bosne i Hercegovine i člana IV. A. 20. (1) d) Ustava Federacije Bosne i Hercegovine prema kojima je u isključivoj nadležnosti Federacije Bosne i Hercegovine, uz ostalo utvrđivanje energetske politike, uključujući raspodjelu između kantona te obezbjeđenje i održavanje potrebne infrastrukture, a Parlament Federacije Bosne i Hercegovine, uz ostala ovlaštenja predviđena Ustavom, odgovoran je za donošenje zakona o obavljanju dužnosti federalne vlasti.

**II - RAZLOZI ZA DONOŠENJE ZAKONA**

Zakon o gasovodu „Južna interkonekcija Bosna i Hercegovina i Republika Hrvatska“ („Službene novine Federacije BiH“, broj: 10/25) donesen je sa ciljem izgradnje nove gasne interkonekcije koja je ključna za održavanje sigurnosti snabdijevanja prirodnim gasom na području cijele Federacije Bosne i Hercegovine, kao i za diverzifikaciju izvora i pravaca snabdijevanja prirodnim gasom.

Izgradnja gasovoda „Južna interkonekcija Bosna i Hercegovina i Republika Hrvatska“ prepoznata je kao projekat od najvećeg prioriteta za Federaciju Bosne i Hercegovine, te je kao takav uvršten u sve ključne strateške, planske i razvojne dokumente donesene na nivou Federacije Bosne i Hercegovine i Bosne i Hercegovine.

Pored toga, Južna interkonekcija predstavlja osnovni preduslov za realizaciju drugih strateških razvojnih projekata od državnog i entitetskog značaja, prije svega za izgradnju gasnih elektrana koje bi imale ključnu ulogu u stabilizaciji elektroenergetskog sistema, povećanju fleksibilnosti proizvodnje električne energije i podršci tranziciji ka niskokarbonskom energetsom miks.

Federalno ministarstvo energije, rudarstva i industrije zaprimilo je Pismo namjere od kompanije AAFS Infrastructure and Energy LLC (u daljem tekstu: AAFS), koja je registrovana u Sjedinjenim Američkim Državama, a čija je namjera i cilj uspostavljanje struktuiranog, transparentnog i institucionalnog dijaloga sa Vladom Federacije Bosne i Hercegovine u vezi sa razvojem, finansiranjem i realizacijom integrisanog paketa strateške infrastrukture od nacionalnog značaja uspostavljanjem posebnog namjenskog društva.

Kako se navodi u Pismu namjere AAFS je američka investiciona i trgovačka kompanija iz oblasti energetike i infrastrukture, specijalizovana za međunarodni razvoj infrastrukturnih projekata, finansiranje energetskih projekata, nabavku LNG-a i globalnu trgovinu, trgovinu naftom i gasnim energentima, strateška partnerstva u oblasti logistike, terminala i regasifikacije.

U Pismu namjere se navodi kako se AAFS pozicionira kao strateški predvodnik za međunarodne investitore koji traže strukturirane, transparentne i visokouticajne investicione prilike u Bosni i Hercegovini, te djeluje kao most između globalnog kapitala i lokalnih mogućnosti u razvoju velikih infrastrukturnih, energetskih, industrijskih i turističkih projekata. Također se navodi kako je AAFS prva institucionalna platforma takve vrste u Bosni i Hercegovini, a koja objedinjava međunarodnu ekspertizu u struktuiranju i finansiranju investicija, napredno operativno znanje te pažljivo razvijen i snažan portfolio projekata.

Vlada Federacije Bosne i Hercegovine, razmatrajući dostavljeno Pismo namjere na 65. sjednici održanoj 14.01.2026. godine, donijela je Zaključak V. broj: 29/2026 kojim se prima na znanje informacija o Pismu namjere, daje podrška intenziviranju aktivnosti na realizaciji projekta izgradnja gasovoda „Južna interkonekcija Bosna i Hercegovina i Republika Hrvatska“ uključujući nastavak postupka zaključivanja međudržavnog sporazuma između Bosne i Hercegovine i Republike Hrvatske, te u tom smislu formiranje delegacije iz svih relevantnih institucija. Donesenim zaključkom zadužen je premijer Federacije Bosne i Hercegovine da upozna Vijeće ministara radi razmatranja i daljnjih aktivnosti, a Federalno ministarstvo energije, rudarstva i industrije da upozna Ministarstvo vanjske trgovine i ekonomskih odnosa o nastavku postupka zaključivanja Sporazuma između Bosne i Hercegovine i Republike Hrvatske. Ujedno zaduženo je Federalno ministarstvo energije, rudarstva i industrije da pokrene aktivnosti na pripremi izmjena i dopuna Zakona o južnoj interkonekciji.

Jedan od ključnih razloga za opredjeljenje da navedeni projekat realizuje privredno društvo AAFS Infrastructure and Energy d.o.o. sa sjedištem u Sarajevu čiji je osnivač podnosilac Pisma namjere je jačanje energetske sigurnosti Federacije Bosne i Hercegovine i Bosne i Hercegovine, uklanjanje monopola jednog dobavljača gasa, diverzifikacija izvora gasa, kao i integracija u zapadni energetski sistem i usklađivanje sa EU energetskim tržištem.

U vezi sa navedenim Vlada Federacije Bosne i Hercegovine prosljedila je Federalnom ministarstvu energije, rudarstva i industrije zaprimljenu samoinicijativnu ponudu AAFS Infrastructure and Energy LLC sa sjedištem u Washingtonu D.C. Sjedinjene Američke Države za realizaciju Projekta, kojom se definiše da će se Projekat realizovati putem namjenskih društava posebne namjene (SPV-Special Purpose Vehicle).

AAFS Infrastructure and Energy d.o.o. sa sjedištem u Sarajevu dostavilo je Federalnom ministarstvu energije, rudarstva i industrije dopis kojim potvrđuje da je kod Općinskog suda u Sarajevu izvršena izmjena podataka kod registracije privrednog društva te da puni naziv firme društva sada glasi: AAFS Infrastructure and Energy

društvo sa ograničenom odgovornošću Sarajevo sa sjedištem u Splitskoj ulici broj 12, Sarajevo – Novo Sarajevo, skraćeni naziv firme „AAFS“ d.o.o. i osnivač sa 100% udjelom AAFS Infrastructure and Energy L.L.C. društvo sa ograničenom odgovornošću sa sjedištem u Sjedinjenim Američkim Državama.

Federalno ministarstvo pravde, aktom broj: 03-45-836/26 od 05.03.2026. godine dostavilo je mišljenje da nema smetnji kada je u pitanju zakonsko rješenje u kojem će pravna osoba sa stranim kapitalom biti određena kao investitor projekta gasovoda „Južna interkonekcija Bosna i Hercegovina i Republika Hrvatska“.

Pored navedenog, uključivanje stranog investitora predstavlja kompromisno rješenje kada je u pitanju izbor investitora. Uključivanje stranog investitora u projekat Južne interkonekcije vrijedan više stotina miliona dolara obezbijedio bi privatni kapital, smanjio potrebe za zaduživanjem javnog sektora što smanjuje teret na budžet Federacije Bosne i Hercegovine, te bi se omogućio lakši pristup finansijskim institucijama i fondovima što bi ubrzalo realizaciju projekta u odnosu na kapacitete Federacije Bosne i Hercegovine da samostalno finansira stratešku energetska infrastrukturu.

### **III - USKLAĐENOST S PROPISIMA EUROPSKE UNIJE**

Nakon uvida u propise Evropske unije i analize odredbi ovoga zakona, utvrđeno je da se ovim zakonom ne vrši usklađivanje sa propisima Evropske unije.

### **IV - OBRAZLOŽENJE POJEDINIH ODREDBA**

Članom 1. Prijedloga zakona u članu 1. navedene su na postojećem pravcu Grude kroz koje prolazi trasa gasovoda, te Donji Vakuf, kao i odvojak za Čapljinu i dodatni pravac Kladanj – Tuzla neophodan za izgradnju gasne elektrane. Pored navedenog brišu se i riječi: „tačku interkonekcije“ obzirom da je predloženo brisanje člana 4. Zakona.

Članom 2. Prijedloga briše se član 4. Zakona kojim je bio definisan način određivanja koordinata tačke interkonekcije transportnih sistema.

Članom 3. Prijedloga zakona u cijelosti se mijenja postojeći član 5. Zakona na način da se za nosioca investicije projekta izgradnje gasovoda „Južna interkonekcija BiH i Republika Hrvatska“ određuje kompanija AAFS Infrastructure and Energy d.o.o. sa sjedištem u Sarajevu (u daljnjem tekstu: Investitor).

Prava i obaveze ugovornih strana u vezi sa realizacijom ovog projekta urediti će se Ugovorom uz mogućnost primjene na isti Zakona o koncesijama Federacije Bosne i Hercegovine koji će Investitor i Vlada Federacije Bosne i Hercegovine sklopiti u roku od 30 dana od stupanja na snagu ovog zakona.

Navedenim članom se definiše šta ovaj ugovor mora najmanje sadržavati što će se utvrditi posebnim zaključkom Vlade Federacije Bosne i Hercegovine.

Operator postojećeg transportnog sistema u Federaciji Bosne i Hercegovine kao dotadašnji nosilac investiciono – tehničke dokumentacije i važećih akata na zahtjev Investitora zadužen je da preda tu dokumentaciju u roku od 15 dana od dana podnošenja zahtjeva uz obavezu Investitora na snošenje stvarnih troškova koje je Operator postojećeg transportnog sistema u Federaciji Bosne i Hercegovine izdvojio za izradu te dokumentacije.

Nakon preuzimanja navedene dokumentacije Investitor će podnijeti zahtjeve nadležnim tijelima za izmjenu svih važećih akata koji su ovim zakonom zaduženi da izvrše izmjenu važećih akata u roku od 15 dana od dana prijema pisanog zahtjeva Investitora.

Investitor će projekat izgradnje gasovoda „Južna interkonekcija BiH i Republika Hrvatska“ realizirati kroz izgradnju trase definisane u članu 1. ovog zakona.

Investitor je dužan nakon puštanja u pogon gasovoda „Južna interkonekcija BiH i Republika Hrvatska“ obezbijedi njegov siguran rad i sve tehničke uslove za prihvatanje u transportni sistema gasa i njegovu isporuku korisnicima, dok je Operator postojećeg transportnog sistema u Federaciji Bosne i Hercegovine zadužen da osposobi postojeći vlastiti transportni sistem (etapno) za reverzibilan rad i prilagodi ga tehničkim zahtjevima i na taj način omogući stabilno snabdijevanje postojećih potrošača u Federaciji Bosne i Hercegovine.

Ujedno je definisano da Investitoru bez prethodnog odobrenja Parlamenta Federacije Bosne i Hercegovine nije dozvoljeno vršenje bilo kakve, direktne ili indirektno promjene vlasničke ili upravljačke kontrole nad Investitorom, uključujući sticanje ili raspolaganje sa više od 15% udjela, otuđenje ekonomskih interesa, davanje opcija ili na bilo koji drugi način opterećivanja udjela u Investitoru.

Investitor je dužan prijaviti svaku namjeravanu promjenu iz stava (9) ovog člana Vladi Federacije Bosne i Hercegovine. Nepostupanje po ovoj obavezi predstavlja osnov za pokretanje postupka oduzimanja prava dodijeljenih ovim zakonom.

Članom 4. Prijedloga zakona briše se član 6. Zakona iz razloga što se navedenim članom Zakona propisuje finansiranje projekta budžetskim sredstvima, raspolaganje profitom investitora od strane Vlade Federacije Bosne i Hercegovine, davanje državnih garancija po kreditnim aranžmanima i drugo, a što je bilo primjenjivo na javnu kompaniju.

Članom 5. Prijedloga zakona u cijelosti se mijenja postojeći član 7. Zakona na način da je definisano pored odredbe koja je bila sadržana u postojećem članu 7., a odnosila se na utvrđivanje javnog i strateškog interesa Federacije Bosne i Hercegovine za projekat „Južna interkonekcija BiH i Republika Hrvatska“ i utvrđivanje investitora za korisnika eksproprijacije koji je oslobođen plaćanja naknade za ekspropriisanu nekretninu Federaciji Bosne i Hercegovine, kantonima, gradovima, općinama, javnim preduzećima ili javnim ustanovama, da se Investitor obavezuje da za ekspropriisanu nekretninu obešteti vlasnike nekretnina, fizička lica.

Ujedno ovim članom su obavezane općinske službe za upravu koje provode postupke eksproprijacije, kroz namjenski formirane komisije, da obezbijede prioritetan rad komisija na predmetima eksproprijacije vezanim za realizaciju projekta „Južna interkonekcija BiH i Republika Hrvatska“.

Pored navedenog definisano je da sve eksproprisane nekretnine dobijaju status dobra od općeg interesa čime se vrši usklađivanje sa odredbama Zakona o stvarnim pravima i Zakona o eksproprijaciji, a omogućava lakšu eksproprijaciju nekretnina i upis promjena u zemljišnim knjigama.

Članom 6. Prijedloga Zakona predložene su izmjene člana 9. stav (3) da bi se zadržalo neograničeno trajanje okolinskih akata za potrebe izgradnje nove infrastrukture koja nije obuhvaćena postojećom Okolinskom dozvolom, tako da bi ovaj član sada glasio: "Okolinska dozvola iz stava (2) ovog člana kao i uslovi zaštite okoliša propisani naknadno u skladu sa stavom (5) ovog člana, izuzetno od odredbi člana 82. stav (5) Zakona o zaštiti okoliša, važi do izdavanja odobrenja za građenje u skladu sa članom 12. ovog zakona."

Članom 7. Prijedloga zakona utvrđeno je stupanje na snagu ovog zakona.

#### **V - FINANSIJSKA SREDSTVA**

Za provođenje ovog zakona nije potrebno obezbijediti dodatna sredstva u Budžetu Federacije Bosne i Hercegovine.

**ODREDBE ZAKONA O GASOVODU "JUŽNA INTERKONEKCIJA BOSNA I  
HERCEGOVINA I REPUBLIKA HRVATSKA" („SLUŽBENE NOVINE FEDERACIJE  
BIH“, BROJ: 10/25) KOJE SE MIJENJAJU I DOPUNJUJU**

**Član 1.  
(Predmet zakona)**

Ovim zakonom se uređuju pitanja od značaja za realizaciju projekta izgradnje gasovoda "Južna interkonekcija Bosna i Hercegovina i Republika Hrvatska" na pravcu Zagvozd (Republika Hrvatska) – Posušje (Bosna i Hercegovina) – Tomislavgrad – Šuica – Kupres – Bugojno – Novi Travnik/Travnik i pravcu Posušje – Široki Brijeg – Mostar, sa odvojcima prema Livnu, Gornjem Vakufu – Uskoplju i Jajcu (u daljnjem tekstu: Južna interkonekcija BiH i Republika Hrvatska) na teritoriji Federacije Bosne i Hercegovine uključujući infrastrukturu projekta, tačku interkonekcije, investitora, način finansiranja, javni interes i provedbu eksproprijacije nekretnina, korištenje zemljišta, upravne postupke izdavanja dozvola i uključenost vlada kantona, nadležnih ministarstava i drugih organa uprave, institucija i privrednih društava i druga pitanja od značaja za realizaciju projekta.

**Član 4.  
(Tačka interkonekcije)**

- (1) Koordinate tačke interkonekcije transportnih sistema definišu se posebnim sporazumom između dva susjedna operatora transportnih sistema, i to: Privredno društvo za proizvodnju i transport gasa "BH-Gas" d.o.o. Sarajevo iz Bosne i Hercegovine i "Plinacro" d.o.o. iz Republike Hrvatske.
- (2) Sporazum o tački interkonekcije iz stava (1) ovog člana je sastavni dio Međudržavnog sporazuma između Bosne i Hercegovine i Republike Hrvatske o izgradnji gasovoda Južna interkonekcija BiH i Republika Hrvatska.

**Član 5.  
(Investitor)**

- (1) Za nositelja investicije projekta gasovoda Južna interkonekcija BiH i Republika Hrvatska određuje se Privredno društvo za proizvodnju i transport gasa BH-Gas d.o.o. Sarajevo (u daljnjem tekstu: Investitor).
- (2) Investitor će projekat izgradnje gasovoda Južna interkonekcija BiH i Republika Hrvatska realizirati kroz:
  - a) izgradnju interkonekcijskog transportnog gasovoda u Bosni i Hercegovini na pravcu Posušje – Tomislavgrad – Šuica – Kupres – Bugojno – Novi Travnik/Travnik i pravcu Posušje – Široki Brijeg – Mostar;
  - b) izgradnju odvojka za Livno, Gornji Vakuf – Uskoplje i Jajce.
- (3) Projekat Južna interkonekcija BiH i Republika Hrvatska će se realizirati u potpunosti od strane Investitora, a u skladu sa tehničkim zahtjevima i pozitivnom analizom isplativosti za dionice gasovoda.
- (4) Investitor je dužan da nakon puštanja u pogon gasovoda Južna interkonekcija BiH i Republika Hrvatska obezbijedi njegov siguran rad i sve tehničke uslove za prihvatanje u

transportni sistem gasa koji se uvozi iz različitih izvora sa pomenutog pravca i njegovu isporuku potrošačima koji su priključeni na transportni sistem, sa ciljem očuvanja postojećeg i razvoja novog tržišta prirodnog gasa.

- (5) Investitor se zadužuje da osposobi postojeći vlastiti transportni sistem (etapno) za reverzibilan rad i prilagodi ga tehničkim zahtjevima, kao neodvojivi dio gasovoda Južne interkonekcije BiH i Republika Hrvatska, i na taj način omogući stabilno snabdijevanje postojećih potrošača u Federaciji Bosne i Hercegovine.

#### **Član 6. (Način finansiranja)**

- (1) Uz podršku Vlade Federacije Bosne i Hercegovine realizacija projekta Južna interkonekcija BiH i Republika Hrvatska će se finansirati zaduživanjem, grantovima, budžetskim i vlastitim sredstvima Investitora, prihodima ostvarenim naplatom transportnih/tranzitnih tarifa te drugim izvorima finansiranja.
- (2) Vlada Federacije Bosne i Hercegovine će sa svoje strane poduzimati raspoložive mjere s ciljem nadzora i osiguranja pozitivnog poslovanja Investitora, a u godinama realizacije projekta ostvarenu dobit Investitora će koristiti za potrebe realizacije projekta Južna interkonekcija BiH i Republika Hrvatska te osigurati potrebne garancije po kreditnim aranžmanima.

#### **Član 7. (Javni interes i provedba eksproprijacije)**

- (1) Utvrđuje se javni interes za izgradnju gasovoda Južna interkonekcija BiH i Republika Hrvatska u svrhu eksproprijacije, nepotpune eksproprijacije i privremenog zauzimanja nekretnina potrebnih za izgradnju, upravljanje i održavanje infrastrukture ovog gasovoda.
- (2) Javni interes iz stava (1) ovog člana utvrđuje se nad nekretninama obuhvaćenim elaboratom o eksproprijaciji koji je sastavni dio idejnog projekta u koji se može izvršiti uvid na web stranicama privrednog društva BH-GAS d.o.o. Sarajevo i Federalnog ministarstva energije, rudarstva i industrije.
- (3) Izmjene elaborata iz stava (2) ovog člana na zahtjev Investitora odobrava Vlada Federacije Bosne i Hercegovine u roku od 30 dana od dana podnošenja zahtjeva.
- (4) Investitor – Privredno društvo za proizvodnju i transport gasa BH-Gas d.o.o. Sarajevo određuje se za korisnika eksproprijacije te ima sva prava, obaveze i odgovornosti korisnika eksproprijacije predviđene Zakonom o eksproprijaciji ("Službene novine Federacije BiH", br. 70/07, 36/10, 25/12, 8/15 – Presuda Ustavnog suda Federacije Bosne i Hercegovine broj U-64/14 i 34/16) i odredbama ovog zakona.
- (5) Izuzetno od odredbi Zakona o eksproprijaciji ("Službene novine Federacije BiH", br. 70/07, 36/10, 25/12, 8/15 – Presuda Ustavnog suda Federacije Bosne i Hercegovine broj U-64/14 i 34/16), Investitor radi potrebe za izgradnju, rad i održavanje projekta Južna interkonekcija BiH i Republika Hrvatska ili osposobljavanje za reverzibilan rad postojećeg transportnog sistema koji je u vlasništvu Investitora ne plaća naknadu za ekspropisanu nekretninu Federaciji Bosne i Hercegovine, kantonima, gradovima,

općinama, javnim preduzećima ili javnim ustanovama.

- (6) Obavezuju se općinske službe za upravu koje provode postupke eksproprijacije, kroz namjenski formirane komisije, da obezbijede prioritetan rad komisija na predmetima eksproprijacije vezanim za realizaciju projekta Južna interkonekcija BiH i Republika Hrvatska.

#### **Član 9. (Zaštita okoliša)**

- (1) Uslove zaštite okoliša za izgradnju gasovoda Južna interkonekcija Bosna i Hercegovina i Republika Hrvatska propisuje Federalno ministarstvo okoliša i turizma.
- (2) Okolinska dozvola izdata do dana stupanja na snagu ovog zakona smatra se rješenjem o odobravanju studije o procjeni uticaja na okoliš u smislu odredbi Zakona o zaštiti okoliša ("Službene novine Federacije BiH", broj 15/21).
- (3) Okolinska dozvola iz stava (2) ovog člana, izuzetno od odredbi člana 82. stav (5) Zakona o zaštiti okoliša, važi do izdavanja odobrenja za građenje u skladu sa članom 12. ovog Zakona.
- (4) Nakon isteka roka iz stava (3) ovog člana, zaštita okoliša osigurava se na osnovu važećeg Zakona o zaštiti okoliša i njemu pripadajućih podzakonskih propisa.
- (5) Uslovi zaštite okoliša za izgradnju dijelova gasovoda Južna interkonekcija Bosna i Hercegovina i Republika Hrvatska koji nisu sadržani u okolinskoj dozvoli iz stava (2) ovog člana propisuju se u skladu sa odredbama važećeg zakona o zaštiti okoliša.

**OBRAZAC IZJAVA O FISKALNOJ PROCJENI**

Obrazac IFP NE

<b>A.1. Obradivač propisa</b>		<b>KOD</b>	<b>NAZIV</b>			
<b>Razdjel</b>	1701	Federalno ministarstvo energije, rudarstva i industrije				
<b>B.2. Osnovni podaci o prijedlogu propisa</b>						
<b>Vrsta propisakta</b>	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
<b>Naziv propisakta</b>	Nacrt Zakona o izmjenama i dopunama zakona o gasovodu "Južna interkonekcija Bosna i Hercegovina i Republika Hrvatska"					
<b>C.3. Izjava o nepoštojanju fiskalnih efekata predložеног propisa</b>						
Nacrt Zakona o izmjenama i dopunama zakona o gasovodu "Južna interkonekcija Bosna i Hercegovina i Republika Hrvatska", nema i neće rezultirati fiskalnim učinkom.						
<b>D.4. Pečat i potpis odgovornog lica</b>		<b>Mjesto i datum</b>		. 25-03-2026		

The image shows a circular official stamp of the Ministry of Energy, Mining and Industry of the Republic of Bosnia and Herzegovina. The stamp contains the text 'REPUBLIKA BOSNA I HERCEGOVINA' and 'MINISTARSTVO ENERGIJE, RUDARSTVA I INDUSTRIJE'. Overlaid on the stamp is a handwritten signature in black ink.